

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



De Meza lo a entrega su caso contra OM ayera

Manera ta conoci recientemente candidato pa minister parlamentario Mike de Meza y su ekipo di abogado a ser informa cu director di DIMP a entrega un keho formal den su contra. De Meza su ekipo a pidi informacion tocante kico ta e acusacionnan cu tin contra e parlamentario, pero como cu no a ricibi respuesta nan a entama un caso contra OM.

E proceso di candidatura pa minister di parlamentario Mike de Meza tin varios luna andando y awor esaki lo ser para atrobe cu e posibilidad di alarga ainda mas pa motibo cu Ministerio Publico (OM), segun De Meza y su abogado a declara diadomingo ultimo, a ricibi un keho oficial di parti di DIMP, locual ta nifica cu OM mester haci un investigacion penal.

Diadomingo ultimo, despues

di yega for di Hulanda, De Meza y su ekipo legal a duna un declaracion na medionan di comunicacion den cual ta indica cu nan a ser informa tocante e keho cu a ser entrega, pero no ta na altura di kico en realidad ta e acusacionnan cu tin contra e parlamentario.

Segun e noticiero local, Noticia Cla, a raporta, abogado di De Meza, Desiree Croes a confirma na e portal cu nan a pidi informacion na OM tocante e acusacionnan y a hasta duna un deadline pa ricibi contesta for di OM, pero como cu no a haya reaccion nan a tuma e decision pa entrega un caso contra OM.

E decision aki ta pa purba forsa OM, cu intervencion di un hues, pa duna De Meza y su ekipo informacion tocante e acusacionnan y kico ta e sospechonan cu tin contra e parlamentario. Ley di 'Strafvordering' ta papia solamente di un periodo "rason-



able" (redelijk) di tempo, dus den e caso aki, abogado di De Meza lo mester argumenta cu e ta di opinion cu e tempo razonable a pasa caba.

Apenas luna pasa, De Meza ya tabata den corte, den un caso cu el a entama contra DIMP, relaciona cu e entrega di un declaracion di comportacion fiscal cu e parlamentario tabatin mester pa su proceso di screening pa bira minister.

Den su veredicto hues a dicta cu e no por interveni y no por duna De Meza locual el a pidi y a bisa cu e decision ta den man di prome minister/ formador Mike Eman. Den su declaracion despues di e veredicto prome minister Eman a indica cu e tabata cla pa tuma e siguiente paso, cual tabata pa sinta cu De Meza y SE Gobernador di Aruba.

E momento ey De Meza no

tabata na Aruba y pues mester a warda e yega Aruba back pa continua cu e proceso, pero awor tur cos ta para atrobe.

No ta conoci ainda kico ta e acusacionnan cu tin contra De Meza. Dialuna ultimo Bon Dia Aruba a tuma contacto cu vocero di Ministerio Publico y tambe pers chef di Gabinete AVP-FUTURO pa puntra tocante e keho aki y e acusacionnan, pero ambos partido a contesta cu no lo duna comentario.

Tambe a purba tuma contacto cu parlamentario De Meza y a puntra e parlamentario si nan tin informacion tocante kico ta trata e keho cu DIMP a entrega na OM, si nan a informa su persona kico ta e acusacionnan cu nan tin contra di dje, con esaki ta afecta su candidatura como minister y si su relacion cu AVP ta afecta, pero no a haya contesta.

Mañan corte ta dicta sentencia den caso Tulipan

Mañan diabierna ta tuma luga uitspraak di caso Tulipan cu ta trata irregularidadnan den Arubahuis y den cual ex minister plenipotenciario di Hulanda, Guilfred Besaril y ex director interino Geln Ling, ta ser acusa di malversacion di placa durante e periodo den nan funcion.

E investigacion 'Tulipan', cu a cuminsa na 2023, ta dirigi riba malversacion di fondonan publico di Pais Aruba na Arubahuis, cu a ser usa pa metanan personal di Besaril tempo e tabata minister plenipotenciario.

Ex minister plenipotenciario Besaril ta ser acusa di a comete malversacion di fondonan publico y abuso di su funcion durante e periodo di 2017-2022 na Arubahuis. Adicionalmente, Ministerio Publico a presenta un demanda di decomiso (ontnemingsvordering) contra e sospechoso pa un suma di casi



200 mil florin.

Di e investigacion Ministerio Publico a indica cu Besaril o a usa e fondonan publico aki pa (entre otro) renobacion y ameublamiento di un cas di huur na Hulanda, pa pagonan di recibonan di Setar, pa servicionan di Setar na adres di su tata y pa cantidad di comemento na restaurantnan na Hulanda y Aruba.



Durante e tratamento di e caso hues a cuestiona con facil Besaril tabata usa e caarchi di banco di Arubahuis den varios instancia den situacionnan cu e no tabata eherciando su funcion oficial y pa beneficiar personal.

Como castigo pa Besaril Ministerio Publico a exige un castigo di 2 aña di prizon incondicional.

Pa loko ta ex director Ling, e ta ser acusa di a participa den malversacion di fondonan publico y abuso di su funcion durante e mesun periodo cu Besaril. Ministerio Publico a remarca cu e tabata responsabel pa finanzas di Arubahuis, pero a keda sin interveni, a pesar cu e tabata wak cu irregularidadnan tabata tuma lugar. For di e investigacion a sali na cla resulta cu Ling mes

no a gosa di bentahanan financiero y pa e motibo ey no apresenta ningun demanda di decomiso contra dje.

Como castigo pa Ling Ministerio Publico a exige un castigo di prizon di 12 luna di cual 6 luna ta condicional cu un tempo di prueba di tres aña.

Durante e tratamento di e caso hues y fiscal a cuestiona Ling capacidad pa eherce e trabou di director y asina evita e gastamento di placa excesivo cu Besaril tabata haci.

Hues a cuestiona tambe con Ling por a permiti esaki y no a actua como un director mester actua na cual Ling simplemente a indica cu su autoridad tabata ser mina y cu e ex-minister plenipotenciario tabata pasa riba dje. Den otro palabra a indica cu su mannan tabata mara y no por a haci mucho.

Uitspraak lo tuma luga pa 1:15 mañan atardi.